

Evening Dogri (NSD) Bulletin 03-10-2023

आकाशवाणी

खास खबर

- प्रधानमंत्री नरेन्द्र मोदी होरें छत्तीसगढ़ च 27 ज्हार करोड़ रपे थमां मते दे विकास प्रोजेक्टें दी शुरूआत कीती।
- विश्व बैंक नै माली ब'रे 2023–24 लेई भारत दी सकल घरेलू उत्पाद जीडीपी दी वृद्धि दर गी 6.3 फीसद पर बरकरार रखेआ।
- खजाना मंत्री निर्मला सीतारमण होरें तमिलनाडु दे कोयंबटूर च प्रधानमंत्री दोआर योजनाएं तैह्त्त दोआर—कर्ज मुहैया करोआया।
- लगातार बरखा दे चलदे बिहार दे कैमूर च जिले दे केई हिस्सें च हाड़ जनेह् हालात न।
- एशियाई खेड़्डें च भारत दा शानदार प्रदर्शन जारी ऐ। भारत दे कुल तगमें दी गिनतरी 68 पुज्जी।

PM-Chhatsgarh

प्रधानमंत्री नरेन्द्र मोदी होरें अज्ज जगदलपुर च 26 ज्हार करोड़ रपे कोला मती लागत दिऐं विकास परियोजनाएं दा नींह पत्थर रखेआ, एह्दे इलावा उनें बस्तर च नगरनारथाहर एनएमडीसी दे ग्रीन फील्ड इस्तपात सयंत्र गी बी देसै दे नमित कीता। 24 ज्हार करोड़ रपे दी लागत कन्नै बनाए गेदे इस स्टील प्लांट च मयारी दर्जे दा फौलाद पैदा कीता जाग। इस सयंत्र दे खुल्लने कन्नै इत्थें कम्म रोजगार दे बी मते मौके पैदा होंगन। जगदलपुर दे अपने दौरे दरान प्रधानमंत्री होरें जगदलपुर रेलवे स्टेशन दा दर्जा बधाने दे कम्मै दा बी नींह पत्थर रखेआ। उनें टकरोकी ते रायपुर बश्कार रेल सेवा गी बी झंडी दस्सियै रवाना कीता।

<><><><><><><>

PM

प्रधानमंत्री नरेन्द्र मोदी होरें आक्खेआ ऐ जे केन्द्र च भारतीय जनता पार्टी दी सरकार देसा दे बुनियादी ढांचे दे विकास पर चेचा ध्यान देआ'रदी ऐ। अज्ज छत्तीसगढ़ दे जगदलपुर च प्रधानमंत्री होरें आक्खेआ जे पिछले 9एं ब'रे च बुनियादी सुविधाएं दे विकास पर खर्चा बधियै 10 लख करोड़ रुपें करी दित्ता गेआ ऐ, जेहड़ा पैहले थमां 6 गुणा मता ऐ। श्री मोदी होरें आक्खेआ जे विकसित भारत दा सुखना उसलै गै पूरा होग जिसलै मुख्ख दा हरेक राज्य, हरेक जिला ते हरेक ग्रां विकसित होग। उनें आक्खेआ जे विकसित भारत लेई भौतिक, डिजीटल ते समाजिक क्षेत्र थमां जुड़ी मूंडलियां सुविधाएं गी भविष्य दी जयरतें दे मताबक तैआर करना होग।

<><><><><><><>

PM

प्रधानमंत्री नरेन्द्र मोदी होरें आक्खेआ जे गरीबें दा देसा दे स्रोतें उप्पर पैहला हक्क ऐ। प्रधानमंत्री मोदी जगदलपुर च छत्तीसगढ़ दे बस्तर खित्ते दे जनजातीय सूबाई मुख्यालय च इक जन बैठक गी संबोधत करा'रदे हे। उनें जात-पात दे गरीब लोकें दी भलाई बेहतरी लेई सरकार दी तनदेई दे बारे गल्ल कीती। उनें आक्खेआ जे उंदी सब्बने शा बड़्डी पैहल गरीबें दी मदद करना ऐ। प्रधानमंत्री होरें कांग्रेस उप्पर दोश लाया जे ओ जात-पात दे नां उप्पर बंडने दा कम्म करा'रदी ऐ। श्री मोदी होरें आक्खेआ जे भाजपा दी अगुवाई आली केन्द्र सरकार नै जनजाति विकास लेई पैहा रखेआ ऐ।

<><><><><><><>

World Bank

विश्व बैंक नै माली ब'रे 2023-24 लेई भारत दी वृद्धि दर दा अनुमान 6.3 फीसद रखने दा फैसला कीता ऐ। भारत च केई बहरूनी चुनैतिएं दे बावजूद मजबूत आर्थिक वृद्धि जारी रौहने गी दिक्खदे होई एह फैसला लैता गेआ ऐ। विश्व बैंक नै अप्रैल दी अपनी रिपोर्ट च 2023-24 च भारत दी वृद्धि-दर दा अनुमान पैहले दे 6.6 फीसद थमां घटाइयै 6.3 फीसद करी दित्ता हा। विश्व बैंक दे भारत दे विकास सरबंधी नमें विवरण मूजब भारतीय अर्थ-बवस्था पर अंतराष्ट्रीय माली संस्थानें दी अर्ध-वार्षिक प्रमुख रिपोर्ट च आक्खेआ गेआ

ऐ जे वैश्विक चुनौतिएं दे बावजूद भारत ब'रे 2022-23 च 7.2 फीसद दी वृद्धि दर कन्नै तेजी कन्नै बघदी प्रमुख अर्थ-बवस्था च शुमार हा।

<><><><><><>

Nirmala Sitharaman

केन्द्रीय खजाना मंत्री निर्मला सीतारमण होरें अज्ज कोयंबटूर च लाभार्थिं गी साढ़ 3 जहार करोड़ रुपें दी मदद राशि बंडी। इस मौके पर आयोजित कार्यक्रम च उनें आकखेआ जे विकास दी तांग आले जिलें गी हर चाल्ली दी सरकारी सहायता देने च प्राथमिकता दित्ती जा'रदी ऐ। इस कार्यक्रम च क्रेडिट आउटरीच कार्यक्रम दे तैह्त्त दुआर-कर्ज दितता गेआ। खजाना मंत्री होरें आकखेआ जे सरकार ग्रामीण करसानें ते उद्यमिं गी सब्सिडी ते लौह्के उद्यमी ते बपारिं गी दोआर सहायता देआ'रदी ऐ ते इस बारे च जागरूक बी करा'रदी ऐ। खजाना मंत्री होरें आकखेआ जे 23 जहार 8 सौ लाभार्थिं गी खुदरा दोआर ते 2 जहार 904 नमें लीगार्थिं गी मुद्रा ऋण दित्ते गे। उनें दस्सेआ जे 18 पट्टी दर्ज जाति, पट्टी दर्ज जनजाति ते महिलां गी स्टैंड-अप इंडिया दोआर दित्ते गे। उनें दस्सेआ जे किसान क्रेडिट कार्ड धारक लोक बी सरकार थमां दोआर दी दरखास्त करी सकदे न। उनें अगै दस्सेआ जे कोयंबटूर च ढाइ जहार स्वयं सहायता समूहें गी बी मदद प्रदान कीती गई। इक लक्ख खाताधारकें गी बक्ख-बक्ख योजनां तैह्त्त दोआर-कर्ज दित्ता गेआ।

<><><><><><>

IAF Border

एयर चीफ मार्शल वी.आर.चौधरी होरें आकखेआ जे भारत खूफिया अजेंसिं, निगरानी ते फौजी प्रशिक्षण रां बन्ने उप्पर हालात दी लगातार तक्क रख'रदी ऐ। उनें आकखेआ जे मुखें दे अभियान सरबन्धी योजना शानदार ऐ ते हालात दे आधार उप्पर बदलदे रौह्दे न। नमीं दिल्ली च अज्ज मीडिया गी जानकारी दिंदे होई श्री चौधरी होरें आकखेआ जे भारतीय ब्हाई फौज कोल शानदार ते लचीली युद्ध सरबन्धी योजना ऐ।

<><><><><><>

Stock Close

मकामी शेयर बजार दा संवेदी सूचकांक अज्ज 316 अंक घटियै 65 जहार 512 उप्पर बंद होआ। नैशनल स्टाक एक्सचेंज दा निफटी गी 110 अंक खल्ल आइयै 19 जहार 529 उप्पर आई गेआ।

<><><><><><>

Earth Quake

राजधानी दिल्ली समेत उत्तर भारत दे केई सारे हिस्सें च दऊं भूचालें दे झटके मसूस कीते गे। नेपाल च आए दे इनें भूचाले दी तीव्रता रिक्टर पैमाने पर 4.6 ते 6.2 नापी गई ऐ। भूचाले दा केन्द्र नेपाल च जिमीं कोला 5 किलोमीटर हेठ हा। पैह्ला भूचाल दिन 2 बज्जियै 25एं मिंटे पर ते दूआ 2 बज्जियै 51 मिंटे पर आया। उआं इंदे करी फिलहाल कुसै जानी जां माली नुक्सान दी कोई जानकारी नैई ऐ।

<><><><><><>

Bihar

बिहार च उपरोतली बरखा दे चलदे कैमूर जिले दे केई हिस्सें च चानचक्क हाड़ जनेए हालात बनी गेदे न। उपरोतली बरखा कारण कर्म-नाशा, दुग्रावति ते सुवारा जलेही मौसमी नदियां पूरे उफान पर नं सुवारानदी दे पानी दा स्तर बधने करी भभुआ शैहर च केइ इमारतां, अस्पताल ते दफ्त पानी दी चपेट च न। डीएवी स्कूल ते कस्तूरबा गांधी आवासीय विद्यालय अहातें च हाड़ दा पानी भरने मगरा आपातकालीन हालात च स्कूली बच्चें गी बचाया गेआ। कैमूर दे जिला मजिस्ट्रेट सावन कुमार होरें आक्खेआ जे प्राथमिक स्वास्थ्य केन्द्र थमां गर्भवती महिलाएं सनें केई मरीजें गी सुरक्षत बाहर कड्डेआ गेआ ऐ। जिला मैजिस्ट्रेट होरें आक्खेआ जे कुसै बी हालात गी दिक्खदे होई आपदा प्रबंधन टीमें गी हाई-अलर्ट पर रखेआ गेआ ऐ। मौसम विभाग नै रोहतास, कैमूर, गया, औरंगाबाद ते आले दुआले दे जिलें च भारी बरखा लेई खबरदार कीता ऐ।

<><><><><><>

Cyclist Girls

कश्मीर थमां लेइयै कन्याकुमारी तगर तगर 37 सौ किलोमीटर दा सफर तैह करने लेई श्रीनगर थमां चली दियां चार साइकल सुआर जिंदे च राजस्थान थमां 8एं ब'रे दी सानवी ते 9एं ब'रें दी रक्षिता चौधरी बी शामिल न, अज्ज उधमपुर पुज्जियां। इनें साइकल सुआरें अपनी यात्रा 30 सितम्बर गी शुरू कीती ही। इस यात्रा पिच्छे दा उंदा मकसद बेटी बचाओ बेटी पढ़ाओ दे बारे च लोकें गी जागरूक करना ऐ। एह साइकल सुआर बच्चियां ना शड़ा साइकल मते कठन रस्ते गी पार करा करदियां न सगुआं जिधरा बी एह लंघदियां न लोकें कन्नै मिलियै उनेंगी कुड़िएं दी शिक्षा दे महत्व बारे जागरूक करा करदियां न ते समाज च कुड़िएं ते जागतें बश्कार दी फर्कोफर्की गी खत्म करने च योगदान देने लेई नोजवानें गी प्रेरित करा करदयां न। इस साइकल दल दी अगुवाई 9एं ब'रे दी रक्षिता चौधरी करै करदी ऐ।

<><><><><><>

Asian Games

हांगझोऊ च एशियाई खेड्डें च भारत दा शानदार प्रदर्शन दा सिलसिला जारी ऐ। भारत नै अज्ज दो सुन्ने दा, इक चांदी ते 4 कैह दे तगमे अपने नां कीते न। भारत आस्सेआ अज्ज 6में ध्याड़े दो सुन्ने दे, इक चांदी दा ते 4 कैह दे तगमे जित्तने कन्नै ओहदे तगमें दी कुल गिनतरी 68 होई गई ऐ। एथलीटिक्स च महिलाएं दी 5 ज्हार मीटर द्रौड़ च पारूल चौधरी नै सुन्ने दा तगमा जित्तेआ। एह पारूल दी प्रतियोगिता च दूआ तगमा ऐ। उनें त्रै ज्हार मीटर स्टीपल चेज च चांदी दा तगमा जित्तेआ। मर्दे दी 8 सौ मीटर द्रौड़ च मोहम्मद अफसल नै चांदी दा तगमा अपने नां कीता। महिलाएं दी 4 सौ मीटर बाधा द्रौड़ च विध्या नै कैह दा तगमा जित्तेआ। बडलै कैनोइडा डबल्स च अर्जुन सिंह ते सुनिल सिंह नै कैह दा तगमा जित्तेआ। मुक्केबाजी च प्रीती नै 54 किलोग्राम वर्ग च कैह दा तगमा जित्तेआ, उत्थें गै लवलीना बोरगोहाइन 75 किलोग्राम दे फाइनल च पुज्जी गई ऐ। तीरदांजी च मर्दे दे कपांडुड व्यक्तिगत इवेंट च अभिषेक वर्मा ते अजेस प्रवीन नै ते महिलाएं च ज्योति सुरेखा बेन्नम नै फाइनल च थाही पक्की कीती। भारत दे कुल तगमें दी गिनतरी हुन 68 होई गई ऐ जेहदे च 15 सुन्ने दे, 26 चांदी दे ते 27 कैह दे तगमे शुमार न।

<><><><><><>

Search-Kalakot

राजौरी जिले दे ब्रोह इलाके च छप्पे दे आतंकवादिएं गी तुप्पी बाहर कड्डने लेई शुरू कीता गेदा व्यापक तुपाई अभियान अजें बी जारी ऐ। फौज दे इक अफसर नै जानकारी दित्ती ऐ जे इलाके च किश बे—पुंछानू लोकें दी संदिग्ध नकलो हरकत बारे इक खूफिया जानकारी थोने परैंत भारतीय फौज ते जम्मू कश्मीर पुलसै इक सांझा अभियान राजौरी जिले दे कालाकोट इलाके च ब्रोह आले जंगली इलाकें च शुरू कीता। आतंकवादिएं दी मजूदगी बारे सटीक पता लाने लेई साइंसी तकनीकें दा बी इस्तेमाल कीता जा करदा ऐ ते तुपाई अभियान अजें बी जारी ऐ। अतिरिक्त पुलस महानिदेशक मुकेश सिंह ते फौज दे बड्डे अफसरें बी उत्थें पुज्जियै जारी अभियान ते मजूदा स्थिति दा जायजा लैता। फौज ते पुलस दे सांझे दल नै ब्रोह ते सूम दौने जंगली इलाकें गी घेरी लैते दा ऐ। घेरा त्रुड़ने लेई छप्पे दे आतंकवादिएं सुरक्षा बलें पर गोलीबारी बी कीती जेह्दा बनकदा परता दित्ता गेआ। होर जानकारी गी बलगेआ जा करदा ऐ।

<><><><><><>

JMC-Campaign

“इमानदार जम्मू कश्मीर ते शानदार जम्मू कश्मीर” अभियान दा प्रचार करने लेई जम्मू नगर निगम बक्ख—बक्ख तालीमी इदारे च जाई जाइयै इस बारे जागरूकता फैला करदा ऐ। जम्मू दे सरकारी एम.ए.एम कालेज च टीचरें ते विद्यार्थिं गी संबोधत करदे होई निगम दे मेयर राजिन्दर शर्मा होरें आक्खेआ जम्मू नगर निगम मुख्रै दा पैहलस ऐसा नगर निगम ऐ जिन्ने सदन च कापोरेटरें दी घट्टोघट्ट योग्यता ग्रैजुएट रखने दा फैसला लैता ऐ। इमानदार जम्मू कश्मीर शानदार जम्मू कश्मीर अभियान दी शुरूआत करदे होई मेयर राजिन्दर शर्मा होरें आक्खेआ जे असेंगी समाज दे सब्बने वर्गे दे सैहयोग दी लोड़ ऐ इस करियै अस कालेजे ते यूनिवर्सिटिं दे विद्यार्थिं गी बी शामिल करने आं। उनें आक्खेआ जे साढ़े नोजवान समाज च बड्डे सुधार आन्नी सकदे न ते औंदे चुनाएं च कोई पैसे जां रसूख दा इस्तेमाल नेई करै एह्दी बी पक्की बवस्था कीती जानी लोड़चदी।

<><><><><><>